

**Pɔɔl gbounsinsinn nba ki u din  
sob ki tur  
TESALONIKA TEEB  
nae na**

*Ki jiin 1 Tesalonika teeb gbouŋ na po*

Tesalonika din tee digbansaakare Masedonia yent ni, ki li tee Rom teeb yent. Pɔɔl nba din nyii Filipi na poor po, u din mɔɔnt barŋanii na ki tur siab leŋ, ki bi teen Yiisaweira.

<sup>1</sup> Min Pɔɔl nan Sailas nan Timoti-e sobin gbouŋ na ki teen niib nba be Tesalonika ki tee ti Baa Yennu nan ti Yomdaano Yiisa Masia nigannkab na; ŋɔɔ Yennu ninkpabauŋ nan parmaasir-ii be nani.

*Tesalonika teeb yada nan bi binbeŋ labaar*

<sup>2</sup> Ti teen Yennu niipoouk i kura paak, ki tian i po yoo kur, ti Yenmiaru ni. <sup>3</sup> Yennu nba tee ti Baa na tɔɔnn, ti tian biaŋinba ki i teeno yada ki tuun toonŋana, nan i lomm nba te ki i tuun nan ninmɔnn biaŋinba, ki i dindann be ti Yomdaano Yiisa Masia ni chib chib na. <sup>4</sup> Ti naa waas, ti mi nan Yennu-e looni ki poŋ ganni a yii tee u yab, <sup>5</sup> kimaan barŋanii na din ki tee ti mɔb ni maan kuukɔɔ kaa ki ti din baar turini, ŋaan li bia din mɔk Seyeenŋ yikooe ki ti piakir ki birsuk kaa. Yoo nba ki ti din be i peŋ na, i mi taa din be biaŋinba; nan taa sommi biaŋinba. <sup>6</sup> I din waa ti binbeŋ nan ti Yomdaano binbeŋe, ki gaar barŋanii maŋ, i farchioŋ ni, nan parpeenn nba

nyi Seyeen boor na. <sup>7</sup> Ki yaa din be biaŋinba na din wann ti naa waas nba be Masedonia nan Akaya yentnba ni na baa sii be biaŋinbae. <sup>8</sup> Kimaan ti Yomdaano barŋanii maŋ din nyii i boore, ki lin Masedonia nan Akaya yentnba ni; ki linba bia pukin, yaa teen Yennu yada biaŋinba poŋ lin lokir kur powa. Li paak, li ji ki kpaa talas ki ti pak siar bi boori. <sup>9</sup> Niib na kur piak jiiint yaa din gaarit biaŋinbae, taa din baar i boor yoo nba na, nan biaŋinba ki i nyik pata ŋaan baar Yennu boor, a yii jiantir ŋoo Yennu nba fo na, <sup>10</sup> ki guu u Bija Yiisa, wunba tan saa nyi Yendouŋ ni ki baar na; wunba ki Yennu din fiino kuun ni, ki u fatit ŋoo Yennu wutoor nba baat na ni na.

## 2

### *Pɔɔl toona Tesalonika doo ni*

<sup>1</sup> Ti naa waas, i moŋ mi nan taa din baar i boor na tan ki teen yanni. <sup>2</sup> I mi taa din be Filipi doo ni, ki bi dintit biak nan fei biaŋinba, ŋaan taa baar i boor, siab lek din yiab a bin goor ti wannu na, ŋaan ki ti moƙ parcheenn nba nyi Yennu boor ki moontir barŋanii maŋ ki teeni. <sup>3</sup> Taa din beeri linba na ki tee linba nyii faak nan dudukbiit ni. Ti din ki kpanni kaa, <sup>4</sup> ŋaan ti moontir Yennu nba loon tii moontir u maan biaŋinbae, kimaan u poŋ la ki ti jaŋ nan tin dia barŋanii maŋa. Li paak, ti ki moontir a ti penn nisaarik par kaa, ŋaan ti loon tin penn Yennu nba bikii ti dudukit na pare. <sup>5</sup> I moŋ mi fanu nan ti din ki baar i boor nan moƙmant, koo maan nba doƙint nianchioŋ kaa. Yennu-e tee

ti siara daano. <sup>6</sup> Ti din ki loon i soo n pakiti. <sup>7</sup> Taa tee Masia toomiinba na, ti din mok yaak nba ki ti saa boi-i sommir powa, naan ti din be i sinsuuk ni soon nnae, ki tee nan poo nba tuu gorii u waas biajinba na. <sup>8</sup> Taa din looni bonchiann na paake ki ti din moontir Yennu barjanii ki teeni; li kuukoo kaa, naan ti bia din teen siir nan tin chibin ti saamanii i paak, kimaan i mantik teen ti niloŋa ki li yabita. <sup>9</sup> Ti naa waas, setik nan monie, i mi taa din tuun ki di fara biajinba. Taa din be i boor ki moontir Yennu barjanii maŋ ki teeni na, ti din tuun yonnu nan nyioŋo, a ti daa tee jikir i soo paaki.

<sup>10</sup> Yimm nan Yennu-e tee ti siaradamm ki jiin taa din be nan yimm Yiisaweira nan binbenyeŋ nan yentinu, ki kaa biit biajinba. <sup>11</sup> I mi biajinba ki ti din kpaani nan joo nba tuu kpaan u waas biajinba na, <sup>12</sup> ki maant i para, ki tun kpaani a yii be binbensiak nba saa gboo Yennu numm. Ŋooe yiini a wun kooni u tioŋ naan ni nan yentchioŋ ni.

<sup>13</sup> Linba yaa paak bia te ki ti piak Yennu yoo kura na tee nnae: Taa din baar nan Yennu maan i boor na, i din gbat ki gaarir; i din ki gaarir nan nisaarik yar na kaa, naan gaarir ki li tee Yennu yar. Ki li set tee nanne, kimaan yimm nba teeno yada na, maan maŋ tuun i para ni. <sup>14</sup> Ti naa waas, mukisbooru nba baari na, li mukisboorue mun din baar binba tee Yennu niib Yiisa Masia paak Judea yent ni na; yimm nan namm dii mukisbooryeŋe. I moŋ moŋ niib nba mukisi biajinba na, li mukisboorue ki bi niib, Juu teeb, mun din mukisib.

<sup>15</sup> Ɔamm Juu teebe din kp̄ii ti Yomdaano Yiisa Masia nan Yennu s̄okiniinba, ki bia mukis timm na. Linba na paak, bi ki penn Yennu pari, ki bia tee s̄oo kur datai. <sup>16</sup> Bi yiab bi m̄oŋ paak gbaa a bin ḡoorit ki ti daa m̄oontir Yennu barŋanii ki teen binba ki tee Juu teeb na ki bi laat tinnu. Linba nae want nan bi pukii toonbiit nba ki bi tuu tuun nae nan Yennu wutoor nba ji tan baar nan tubdatu bi paak.

*P̄ool nba loon wun Ɔamm ḡon Tesalonika teeb bianinba*

<sup>17</sup> Ti naa waas, laa jii yoo waaminna ki ti ki be i boor ni na, ti tee nan kpeebii nae, Ɔaan ti dudukit Ɔarin be nani, ki ti lek bia yiab a tin baar lai nan ti ninbina, <sup>18</sup> kimaan yoo kur, min P̄ool lek loon ki n baar i boore, Ɔaan ki Sintaanii ḡoin s̄onu. <sup>19</sup> Ti Yomdaano Yiisa-i jen yoo nba, yimme sii tee ti dindann nan ti nyoot, ki i paake ki ti tan saa set u boor nan parpeenn nan yuugontir. <sup>20</sup> Setik nan m̄onii, i paake ki ti m̄ok sann nan parpeenn.

### 3

<sup>1</sup> Li paak, laa ji daan tan paak ti nii yoo nba, ki ti tat biar Atens doo ni, <sup>2</sup> Ɔaan tun ti naa bik Timoti, wunba ki timm nan Ɔoo taan tuun ki teen Yennu ki m̄oontir Masia barŋanii na, a wun chee i yada ki k̄ooni para, <sup>3</sup> ki lin te ki i s̄oo daa Ɔmat poor mukisuk na paaki. I m̄oŋ mi nan li mukisbooru tee Yennu loomme ki turit, <sup>4</sup> kimaan taa din daa be i boor ni yoo nba na, ti din beti a bi tan saa mukisit; ki m̄otana i m̄oŋ mi fanu nan li set tan teen nnae chib chib. <sup>5</sup> Li

paak, laa daan tan paak n nii yoo nba, ki n tun Timoti, a wun saan ki laan i nyik Masia sonu koo Sintaanii bikini, ki ti toona fara kur teen yanne-e?

<sup>6</sup> Motana, Timoti poŋ jenna, ki turit labaar nba penn ti para ki jiin i yada nan i lomm po. U betit a i kpan tun tian ti poe fanu, ki loon yin lat nan taa loon tin lai bianjamba na. <sup>7</sup> Ti naa waas, ti be biak nan parbiir kur ni, ŋaan taa gbat i yada po, li te ki ti para doore. <sup>8</sup> Motana, li set maŋit nan yaa set chib ti Yomdaano sonu ni na. <sup>9</sup> Ti teen Yennu niipoouk bonchiann i paak, kimaan taa mok parpeenn bianjamba u boor i paak na. <sup>10</sup> Yonnu nan nyiook kur ti meio nan ti para kura a wun te ki timm nan yimm n la leeb ki tin ŋamm gbeen i yada.

<sup>11</sup> Ti Baa Yennu tioŋ nan ti Yomdaano Yiisa n ŋamm sonu turit ki tin baar i boor. <sup>12</sup> Yaa loon i leeb nan soo kur bianjamba na, wun te ki i lomm maŋ n pukin bonchiann nan taa looni bianjamba na. <sup>13</sup> Nnae ki u saa chee i para, ki i sii tee popeendamm nba ki mok biit ti Baa Yennu boor, yoo nba ki ti Yomdaano Yiisa tan saa jen nan u yab kur na.

## 4

### *Binbeŋ nba pent Yennu par*

<sup>1</sup> Ti naa waas, yaa din tumii ti peŋ yaa sii tuun bianjamba ki pent Yennu par na, nnae ki i poŋ tuun. Motana, ti barimie ki kpaani ti Yomdaano Yiisa sann paak, ii ŋammit kii tuun nna man, <sup>2</sup> kimaan i mi kpaanii nba ki ti din turi, ti Yomdaano Yiisa sann ni na. <sup>3</sup> Kimaan

Yennu loon ki yii tee popeendamme ki daa tuun bonchonchontoona. <sup>4</sup> Sɔɔ kur n bann waa sii be nan u poo, binben-yeɛŋ nan baakir sɔnu bianjinba, <sup>5</sup> ki daa tuun nna nan nianbiiuk binbeŋ nan binba ki mi Yennu nba be bianjinba na. <sup>6</sup> Sɔɔ daa tuun li biitbooru ki teen u loo nba waa Masia, koo ki ŋmaab u loo. Ti poŋ din beti li powa, ŋaan bia kpaani nan ninmɔnn, a Yennu tan saa dat binba tuun nna tuba. <sup>7</sup> Yennu ki yiint a tii tee biitdamm kaa, ŋaan u yaa tii tee popeendamme. <sup>8</sup> Li paak, wunba ki sak wannu nba na, li ki tee nisaarik yar kaa ki u yêti, ŋaan u yêti Yennu nba teeni u Seyeɛŋ na mɔŋ mɔŋe.

<sup>9</sup> Li ki kpaɔ talas ki tin sɔb gbouŋ ki tiari yaa sii loon Masiaweira bianjinba. Yennu poŋ wannu bianjinba ki i sii loon i leeba. <sup>10</sup> Ki i set tuun li bianje na, ki loon ti naa waas kur nba be Masedonia yent ni na. Ti naa waas, ti barimie, ii ŋammit kii tuun nna man, <sup>11</sup> ki ŋaan ki lii tee i dudukit ki yii be soon nna, ki i baka-ii be i mɔŋ toona ni, kii tuun kii dint i mɔŋ, nan taa poŋ din beti bianjinba sinsinn na. <sup>12</sup> Ŋanne saa te ki binba ki tee Masiaweira na n turi baakir, ki li ji kii kpaɔ talas ki yin jɔɔb i mɔŋ ki denn sɔɔ, i bonlonkara paaki.

### *Ti Yomdaano jenu labaar*

<sup>13</sup> Ti naa waas, ti loon yin bann barmɔniie ki jiin Masiaweira nba kpo na po, ki daa mɔk parbiir nan binba ki mɔk dindann nba mɔk na. <sup>14</sup> Ti teen yada nan Yiisa din kpo ŋaan bia fiir kuun niwa; li paak ki ti bia teen yada nan Yennu tan saa te Yiisa n jen nan u weira nba kpo na. <sup>15</sup> Taa wanti linba na tee ti Yomdaano

mōmaame: ti Yomdaano maŋ jenu daar, damm nba tan sii be bi manfoa ni na kan dɔŋ binba kpo na ki chet Masia sanpaapo, <sup>16</sup> kimaan ti Yomdaano tan saa nyi Yendouŋ ni ki sik nan tintianpaari, nan malaka saakɔɔ yiinii, nan Yennu naatunn monii, ki Masiaweira nba kpo na tan saa fiirewa; <sup>17</sup> li yoo, damm nba tan sii be bi manfoa ni na nan ŋamm saa chet ti Yomdaano sanpaapo; ki timm nan ti Yomdaano ji saa taan leeb ki be mɔkmɔk nan mɔkmɔk. <sup>18</sup> Li paak, ii dia mōmaan na kii maant i leeb para.

## 5

### *Teent siir ti Yomdaano jenu po*

<sup>1</sup> Ti naa waas, li ki kpaas talas ki tin sob wanni yoo nba ki linba na tan saa tumi, <sup>2</sup> kimaan i moŋ poŋ mi fanu nan ti Yomdaano jenu daar maŋ tan sii tee nan nanyuko nba tuu baar nyiok bianinba nae. <sup>3</sup> Yoo nba ki niib tan sii yeen a “Parmaasir nan laafia be” na, li yoo maŋe ki biiru tan saa baarib yiama, nan matyiaru nba tuu baar poo bianinba na, ŋaan bi tan kan fit nyi li biiru ni. <sup>4</sup> Ti naa waas, yimm ki be bunbɔnn ni kaa; li paak, li daar tan kii tee nan nanyuko baaru na kaa i boori, <sup>5</sup> kimaan i tee yentu waase. Ti ki tee nyiok yab kaa; ti ki be bunbɔnn ni. <sup>6</sup> Li paak, ti daa dɔɔ gɔont nan nisiab nba tuun bianinba na, ŋaan tii nyoi kii sub, <sup>7</sup> kimaan binba gɔont na gɔont nyioko, ki binba nyu daan yib na mun yib nyiok. <sup>8</sup> Ŋaan timm nba ki tee nyiok yab na, tii sub, ki jii yada nan lomm ki lia, ki lii tee nan naagbankɔŋir

na, ki bia jii tinnu dindann ki yir, ki lii tee nan kut fokirik na. <sup>9</sup> Yennu din ki gannit a wun tan dat ti tuba kaa, ŋaan u gannit a tin la tinnue ti Yomdaano Yiisa Masia paak; <sup>10</sup> ŋooe din gaar ti paak ki kpo, a ti-i lekii kpo amii ti-i be u jenu yoo maŋ, timm nan ŋoo n taan kii be. <sup>11</sup> Li paak, ii kooŋt i leeb para kii sommit i leeb nan yaa poŋ tuun biaŋinba moŋtana na.

### *Kpaanjoontii nan foontjoontii*

<sup>12</sup> Ti naa waas, ti barimie, a i baka-ii be binba tuun ti Yomdaano toonn i boor, ki tee i yudamm u soŋu ni, ki teeni kpaanii na ni. <sup>13</sup> Li teemm baakir nan lomm nba yab, kimaan bi toona nba ki bi tuun na paak. Ii be nan leeb nan parmaasir man.

<sup>14</sup> Ti naa waas, ti barimie, a yii kpaan gbannyakdamm, ki chee jaŋmaandamm para, ki somm tarii, ki di sukuru nan soŋ kura. <sup>15</sup> I daa tuun biit ki jiiŋt biit paaki, ŋaan ii te ki lii tee i lor yoo kur nan yin tun linba ŋan ki tur i leeb nan soŋ kur.

<sup>16</sup> Ii mok parpeenn yoo kur man, <sup>17</sup> kii mei Yennu yoo kur, <sup>18</sup> kii teen Yennu niipoouk bon-siar kur ni, kimaan Yennu nba loon biaŋinbae na, yaa tee Yiisa Masiaweira na paak.

<sup>19</sup> I daa goi Yennu Seyeeŋ nba loon biaŋinba; <sup>20</sup> i daa fiakit Yennu soŋiniinba maami, <sup>21</sup> ŋaan ii tuu mintaa ki bikin bon-siar kur, ki gaar linba ŋan, <sup>22</sup> ki nyi biitbooru kur ni.

<sup>23</sup> Yennu nba teent parmaasir na tioŋ n teeni popeendamm nan barmonii, ki dia i sei nan i manfoa nan i gbanant mun, ki li daa mok biit, ti Yomdaano Yiisa Masia jenu yoo maŋi.



24 Yennu nba yiini na saa tun nnawa, kimaan u tee barmonii daanɔe.

25 Ti naa waas, ii mei Yennu kii teent man.

26 Ii foont Masiaweira na kura ki kpamii.

27 Ti Yomdaano sann nie ki n kpaani, ii karin gbouŋ na ki tur Masiaweira na kur.

28 Ti Yomdaano Yiisa Masia ninkpabaŋ-ii be nani.

**Yennu Gbouŋ Mɔɔr**  
**Bimoba: Yennu Gbouŋ Mɔɔr Bible**

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 21 Sep 2022 from source  
files dated 11 Jul 2022

00d89ba0-4677-52d9-9bc5-aa3d7c5c966d